

廿二史考異

宋史四

廿二史攷異七十

錢大昕學

禮志五

又加上五嶽帝后號東曰淑明南曰景明西曰肅明北曰正明 正明本是貞明史家避仁宗嫌名追改二月七日宴羣臣於大明殿 史家紀日例書干支從無以一二數者惟宋史禮志則否

可遣官往建康府元符萬歲宮 萬歲當作萬寧景德建康志元符萬寧宮在茅山徽宗皇帝御題楠禮志八

攷異

宋史四

伯魚母开官氏鄆國夫人 开當作并鄆當作鄆今曲
阜孔廟石刻追封勅文字完好可證漢禮器碑并官
聖妃在安樂里元至順元年加封文宣王妻并官氏
爲大成至聖文宣王夫人詔今句容縣有石刻亦作
并與宋碑正同世俗稱孔子娶开官氏本於家語家
語近代刊本多謄字攷漢宋元石刻俱是并字殆明
以來轉寫之誤爾

二年五月乙卯詔追封十哲爲公七十二弟子爲侯
按文獻通攷是年贈侯者六十二人并十哲爲七十
二人志云七十二侯誤也又攷大觀二年追封公夏

首等十人改封曾參等八人政和五年追封樂正子克等十七人又大觀三年追封算學從祀風后等六十六人禮志皆備書而祥符追封七十二人爵號獨不備載亦例之疏也

後魏商紹長樂子 商紹卽殷紹避宋廟諱改藝文志五行類有商紹太史堪輿歷一卷唐書作殷紹

咸淳三年詔封曾參鄆國公孔伋沂國公配享先聖

按自唐至於治平先師配位惟有顏子熙寧始增孟子政和又進王安石未幾降入從祀仍止顏孟二配至是始進曾子子思升居孟子之上其位皆東面非

若十哲之分列東西也

費公閔損薛公冉雍黎公端木賜衛公仲由魏公卜商
居殿上東面西向北上鄆公冉耕齊公宰予徐公冉
求吳公言偃陳公顓孫師居殿上西面東向北上

按大中祥符初追封閔損琅邪公冉耕東平公冉雍
下邳公宰予臨淄公端木賜黎陽公冉求彭城公仲
由河內公言偃丹陽公卜商河東公其進封一字公
未詳何時志亦失書

秦將王翦鎮山伯 當是恆山避諱易恆爲鎮
禮志十

時宰臣趙汝愚既以安石之論爲非異議者懼其軋已藉以求勝事既不行熹時已得罪遺汝愚書予謂僖祖之當祧久矣熙寧集議則韓維是而安石非紹熙集議則汝愚是而元晦非元晦尊程氏學而伊川亦取安石之說故持其議甚堅至詆汝愚以爲拆祖宗之廟以快其私此負氣之強詞非至公之正論也宗廟之禮有以功德而尊之者是百世不祧者也有以四親而尊之者是親盡則祧者也宋之帝業創于太祖自宣祖而上四廟以天子之高曾祖禰而祀之非以其有功德而祀之也五服之制父至親而祖次

之會高又次之宣祖尚可祧何獨僖祖不可祧乎僖祖既非得姓之始又非封爵之始方諸殷周則報乙組紺之流也而欲擬稷契以爲始祖謬矣如謂已立之廟不當更毀則禮何以有廟祧壇墠之別如謂太祖在天之靈必有所不忍則順翼宣三祖何又忍而去之安石之頗僻固不足道元晦南渡儒宗乃守一先生之言不復權其當否斯爲通人之蔽矣

禮志十二

元豐五年始就官作十一殿悉迎在京寺觀神御入內盡合帝后奉以時王之禮按長編紀事本末云詔

有司度官之東西建六殿爲原廟奉祖宗之靈設以昭穆之次列于左右又爲別殿五于其北以奉母后宣祖殿名曰天元藝祖曰皇武太宗曰大定真宗曰熙文仁宗曰美成英宗曰治隆長編不載母后五殿名以此志參攷之當卽太始儼極輝德衍慶而尚缺其一後讀咸淳臨安志載景靈宮諸殿名宣祖天元后太始太祖皇武后儼極太宗大定后輝德真宗熙文后衍慶仁宗美成后繼仁英宗治隆后徽音乃知所缺者繼仁一殿也元豐間英宗后尚無恙故帝六而后止五

其殿名徽宗曰承元欽宗曰端慶高宗曰皇德孝宗曰
系隆光宗曰美明寧宗曰垂光 按臨安志徽宗后
曰順承欽宗后曰繼德高宗后曰章順孝宗后曰嗣
徽光宗后曰光順寧宗后曰體德此志亦失書

禮志十四

紹興十三年閏四月十七日冊貴妃吳氏爲皇后 按
高宗紀閏月己丑立貴妃吳氏爲皇后以前後月日
檢之己丑非十七日當有一誤

禮志十六

元祐二年九月經筵講論語徹章賜宰臣執政經筵官

宴于東宮帝親書唐人詩賜之 此事一卷兩見一
在大宴一在曲宴

景德二年十二月五日宴尚書省五品云云 按景德
紀元止于四年而此下有六年七月二十九日詔輔
臣觀粟于後苑云云當是大中祥符之六年也其下
又云四年七月十一日詔近臣及寇準馮拯觀內苑
穀云云十月二十九日詔皇太子宗室近臣諸帥赴
玉宸殿觀稻云云則天禧之四年也真宗以天禧二
年冊皇太子此有皇太子必在天禧以後矣真宗紀
天禧四年十月丙午召皇子宗室近臣玉宸殿觀稻

賜宴卽其事也

禮志二十一

又詔應節鎮郡守往令陞辭歸許登對不特審觀人材亦所以重外任也 節鎮郡守謂節度州之知州也 春明退朝錄云凡節度州爲三品刺史州爲五品

禮志二十二

至和初太常博士祖無擇言按前史孔子後襲封者在漢魏曰褒成褒尊宗聖在晉宋曰奉聖後魏曰崇聖北齊曰恭聖後周隋並封鄒國唐初曰褒聖開元中始追謚孔子爲文宣王又以其後爲文宣公不可以

祖謚而加後嗣遂詔有司定封宗愿衍聖公 無擇
疏已見本傳太常博士蓋其寄祿官而傳失書褒尊
當作褒亭

熙寧中以四十八代孫若蒙爲沂州新泰縣主簿襲封
攷闕里志若蒙若虛皆宗愿之子當云四十七代
志稱若虛卒以若蒙子端友襲端友卒弟端操子玠
襲玠卒子摺襲摺卒子文遠襲文遠卒子萬春襲萬
春卒子洙襲史但書其名而不著世系亦疏漏也

禮志二十六

太祖建隆二年六月二日皇太后杜氏崩于滋德殿

攷異

宋史四

諸后妃崩夢諡號祔廟先後之序已見后妃傳其月
日則本紀復詳書之而禮志園陵篇又一一載入此
重複之甚也

選舉志一

直史館蘇軾曰得人之道在於知人知人之法在於責
實使君相有知人之明朝廷有責實之政則胥史卑
隸未嘗無人雖用今之法臣以爲有餘使無知人之
明責實之政則公卿侍從常患無人况學校貢舉乎
雖復古之制臣以爲不足矣時有可否物有興廢使
三代聖人復生于今其選舉亦必有道何必由學乎

且慶歷閒嘗立學矣天下以爲太平可待至于今惟
空名僅存今陛下必欲求德行道藝之士責九年大
成之業則將變今之禮易今之俗又當發民力以治
宮室歛民財以養游士置學立師而又時簡不帥教
者屏之遠方徒爲紛紛其與慶歷之際何其至于貢
舉或曰鄉舉德行而略文章或曰專取策論而罷詩
賦或欲舉唐故事采譽望而罷封彌或欲變經生帖
墨而攷大義此數者皆非也云云帝讀軾疏曰吾固
疑此得軾議釋然矣 按軾傳亦載此疏五百餘言

大略相同

願以解額之歸升貢者一二分不絕科舉 此語難解
攷毛注傳本云願留貢籍三分暫存科舉以待學外
之士較之此文稍明白

選舉志二

先召試蔡延慶等十人 按十人之名見於麟臺故事
蓋度支員外郎蔡延慶屯田員外郎葉均太常博士
劉攽夏倚太子中允張公裕大理寺丞李常光祿寺
丞胡宗愈雄武軍節度推官章惇前密州觀察推官
王存而尚缺其一也及召試學士院以劉攽王存爲
館閣校勘張公裕李常爲祕閣校理胡宗愈爲集賢

校理夏倚章惇雖入等以御史有言倚得江西轉運判官惇改著作佐郎而已宋史蔡延慶傳不云爲度支員外郎李常傳不云爲大理丞章惇傳不云爲雄武軍節度推官蓋程俱所記皆寄祿之官而史所載者差遣之官似異而實非異也

選舉志四

凡改官留守兩府兩使

謂節度觀察

判官進士授太常丞餘

人太子中允支使掌書記防禦團練判官進士授太子中允餘人著作佐郎兩使推官軍事判官令錄事參軍進士授著作佐郎餘人大理寺丞初等職官知

攷異

宋史四

八

縣知錄事參軍防禦團練軍事推官軍監判官進士
授大理寺丞餘人衛尉寺丞惟判司主簿縣尉七考
進士授大理寺丞餘人衛尉寺丞 此選人改官之
制亦見職官志所云有出身者進士也無出身者奏

蔭也

選舉志謂
之餘人

凡制舉進士九經出身者校書郎正字寺監主簿助教

並轉大理評事

職官志無
助教一官

評事轉本寺丞任太祝奉

禮郎者轉諸寺監丞諸寺監丞轉著作佐郎或特遷

太子中允祕書郎由大理寺丞轉殿中丞由著作佐

郎轉祕書監丞資淺者或著作郎優遷者爲太常丞

後官志第一人及第者許事轉著作佐郎著作佐郎轉太常丞由太子中允祕書郎

轉太常丞

職官志祕書郎與太常丞正丞著作郎同在一行

三丞著作皆遷

太常博士轉屯田員外郎優者爲禮部工部祠部主

客由屯田轉都官優者爲戶部刑部度支金部由都

官轉職方優者爲吏部兵部司封司勳其轉郎中亦

如之

六部二十四司分爲前行中行後行凡三等

左右司員外郎太平興

國中有之後罕除者左右司郎中惟待制以上當爲

少卿者卽爲之由前行郎中轉太常少卿祕書少監

職官志脫祕書少監一官

由此二官轉右諫議大夫或祕書監光

祿卿諫議轉給事中資淺者或右轉左給事中轉工

部禮部侍郎至兵部吏部轉左右丞由左右丞轉尚

書自侍郎以上或歷曹或超曹皆繫特旨

侍郎敘遷則由工而

刑而兵而轉右丞由禮而戶而吏而轉左丞凡三階尚書則六部各爲一階矣諸科及無出

身者校書郎正字寺監主簿助教並轉太祝奉禮郎

太祝奉禮郎轉大理評事評事轉諸寺監丞諸寺監

丞轉大理寺丞大理寺丞轉中舍優者爲左右贊善

資淺者爲洗馬由幕職爲著作佐郎者轉太子中允

由中允贊善中舍洗馬皆轉殿中丞

職官志太子中允轉太常丞

殿中丞轉國子博士由國子博士轉虞部員外郎優

者爲膳部由虞部轉比部優者爲倉部由比部轉駕

部優者爲考功或由水部轉司門司門轉庫部爲郎
中亦如之至前行郎中轉少卿監或一轉或二三轉
卽爲諸司大卿監自大卿監特恩獎擢或入給諫焉
職官志前行郎中轉司農少卿再轉光祿少卿三轉
司農卿四轉少府監五轉衛尉卿六轉光祿卿七轉
祕書監八轉太子賓客九轉至工部侍郎其爲臺省官則正言監察比太
常博士殿中司諫比後行員外郎起居郎舍人侍御史
比中行員外郎起居轉兵部吏部員外郎職官志失載吏部
侍御史轉職方員外郎優者爲兵部司封職官志侍御史祇轉
司封員外郎恐有脫文知制誥由正言以上至郎中皆敘遷兩
資中行郎中爲左右司郎中若非次酬勞有遷三資

或止一資者左右司郎中爲知制誥若翰林學士者
知制誥與翰林學士謂之兩制遷中書舍人由中書舍人轉禮部以
上侍郎入丞郎卽越一資以上內職學士待制亦如
之 此文官敘遷之制亦見職官志

其內職自借職以上皆循資兩遷

兩疑是而字

至東頭供奉

官者轉問門祇候閣門祇候轉內殿崇班崇班轉承
制承制轉諸司副使 此亦見職官志但彼志東頭
供奉官卽轉內殿崇班少閣門祇候一資

至皇城使者轉昭宣使昭宣使轉宣慶使宣慶使轉景
福殿使 此亦見職官志

凡入官則進士

職官志又

入望州判司次畿簿尉九經

入緊州判司望縣簿尉五經三禮通禮三傳三史明

法入上州判司緊縣簿尉學究有出身人

職官志云武舉得班

入中州判司上縣簿尉太廟齋郎入下州

職官志云中下

州此脫

判司中縣簿尉郊社齋郎試銜無出身人入

下州判司中下縣簿尉此亦見職官志

除授職事官並以寄祿官品高下爲法凡高一品以上

者爲行下一品者爲守二品以下者爲試品同者不

用行守試此亦見職官志

中書舍人程大昌言舊制選人改秩後復任闕升通判

通判兩任關升知州知州兩任卽理提刑資序除授之際則又有別以知縣資序隔兩等而作州者謂之權發遣以通判資序隔一等而作州者謂之權知上而提刑轉運亦然隔等而授是擇材能也結銜有差是參用資格也今得材能資格俱應選者爲上其次則擇第二任知縣以上有課績者許作郡初任通判以上許作監司第二任通判以上許作職司庶幾人法並用。按此奏見周必大集蓋與大昌連名具奏者

選舉志六

淳熙二年因臣僚言沿邊七路每路以文臣一人充安撫使以治民武臣一人充都總管以治兵此亦見職官志七路謂揚州廬州荆南襄陽金州興元興州也

宋史四終

攷異

宋史四

七

宋史五

廿二史攷異七十一

錢大昕學

職官志一

又以文彥博落兼侍中除守太尉 彥博先以守司徒
兼侍中領節鎮元豐改官制以侍中爲職事官非退
閑者所宜帶故落侍中之名仍遷一官以寵之太尉
在司徒之上也

太保十一人蔡攸肅王樞至儀王框

文獻通攷同

今以徽

宗紀攷之宣和中皇子除太保者肅王樞景王杞濟
王栩康王構祁王模徐王棣沂王框祇有七人鄭居

中除太保而卽薨定王桓由太保正儲位嘉王楷由太保進太傅俱不當在計數之內疑志誤也儀王當爲沂王音之謬

自建隆至熙寧真拜侍中纔五人 洪邁容齋隨筆云國朝見任宰相帶侍中者才五人范魯公質趙韓王普丁晉公謂馮魏公拯韓魏王琦

左司諫左正言 按司諫正言卽唐之補闕拾遺也宋初亦沿其名端拱元年二月改補闕爲司諫拾遺爲正言志失書

登聞檢院隸諫議大夫登聞鼓院隸司諫正言 唐時

有廳院太宗雍熙元年改廳院爲登聞鼓院東延恩
廳爲崇仁檢院南招諫廳爲思諫檢院西申寬廳爲
申明檢院北通元廳爲招賢檢院

重和元年給事中張叔夜言 文獻通攷作宣和元年
中書令國朝未嘗眞拜以宅官兼領者不預政事然止
曹僧一人 容齋隨筆云國朝勦業之初吳越國王
錢俶天雄節度符彥卿雄武王景武寧郭從義保大
武行德成德郭崇昭義李筠淮南李重進永興李洪
義鳳翔王彥超定難李燾興荆南高保融武平周行
逢武寧王晏武勝侯章歸義曹元忠十五人同時兼

中書令太宗朝惟除石守信而趙普以故相拜真宗
但以處親王嘉祐末除宗室東平王允弼襄陽王允
良元豐中除曹佾與允弼允良相去十七八年爵秩
固存沈括筆談謂有司以佾新命言自來不曾有活
中書令請俸則例蓋妄也

舍人四人舊六人掌行命令爲制詞 按中書舍人六
員分押尚書六曹本唐代故事宋初以舍人爲寄祿
官別置知制誥行舍人之職春明退朝錄載端拱中
西掖六舍人旣而田錫罷職知陳州宋湜貶均州團
練副使王元之商州團練副使是知制誥亦以六人

爲額也又攷容齋三筆載至和元年鄧州繳進王公
春秋通義一書二年有旨送兩制看詳於是具奏列
名知制誥五人起居舍人王珪右司諫賈黯兵部員外郎韓絳起居舍人吳奎右正言劉敞
春明錄又載熙寧二年閣老錢君倚守江寧明年
予自請出院李才元蘇子容皆落職惟吳冲卿權三
司使不供職閣下無人草制則其時知制誥亦止五
人矣志云舍人四人則元豐新定之制也

國初爲所遷官實不任職復置知制誥及直舍人院主
行詞命與學士對掌內外制 唐中葉以後翰林學
士掌內制中書舍人掌外制謂之兩制然亦恒以宅

官知制誥行舍人事唐末趙光逢以中書舍人爲翰林學士其弟光裔亦由膳部郎中知制誥對掌內外命書士歆羨之後晉時陶穀以虞部員外郎知制誥會晉祖廢翰林學士遂兼掌內外制周廣順中竇儼以主客員外郎知制誥其兄儀自閣下入翰林兄弟同日拜命分居兩制時人榮之又扈蒙以右拾遺知制誥從弟載時爲翰林學士兄弟並掌內外制時號二扈蓋知制誥與學士對掌兩制自唐五代皆然不始於宋初矣直舍人院太平興國初置以張洎王克正爲之自後不復除熙寧三年宋敏求蘇頌李大臨

皆以知制誥繳還李定詞頭罷免王安石乃請以蔡延慶王益柔直舍入院欲令草李定制乃除知制誥也自元豐官制行舍人始復舉其職以資淺而除直院者益多矣

凡有除拜中書吏赴院納詞頭 文獻通攷富弼爲知制誥封還劉從愿妻遂國夫人詞頭唐時唯給事中得封還詔書中書舍人繳詞自弼始

南渡後置左右丞相省僕射不置 南渡初亦仍左右僕射之名至乾道八年乃改爲丞相耳志所云未核

職官志二

簽書院事同簽書院事 按太平興國四年置簽署樞密院事以樞密直學士石熙載爲之八年以張齊賢王沔同簽署院事景德三年馬知節韓崇訓亦爲簽署史家避英宗諱改署爲書爾治平中郭遵以檢校太尉同簽書樞密院事簽書之名始于此

三司使 五代會要後唐長興元年八月勅張延期可充三司使班位在宣徽使之下唐朝以戶部度支掌泉貨鹽鐵則別置使名戶部度支則尙書省本司侍郎郎中判其事天寶中楊慎矜王鉉楊國忠雖承恩顧皆守本官別帶使額下及劉晏第五琦亦如舊制

自後又以宰臣各判一司不帶使額僞梁置租庸使
總天下徵賦莊宗亦踵其事暨今上登位削去使名
命重臣一人專判曰判三司至是延朗自許州入掌
國計白於樞密使請置三司使宣下中書門下宰臣
以非故事擬授延朗充諸道鹽鐵使兼判戶部度支
上不從三司置使名自延朗始也

翰林學士 洪容齋云翰林本以六員爲額劉沆作相
典領溫成皇后喪事以王洙同其越禮建明於是員
外用之至和二年鄧州繳進王汾春秋通義有旨送
兩制看詳其時學士七人曰學士承旨禮部侍郎楊

察學士中書舍人趙槩楊偉刑部郎中胡宿吏部郎中歐陽修起居舍人呂溱禮部郎中王洙卽其時也予按新唐志雖云學士無定員然白居易詩有同時六學士五相一漁翁之句則唐時學士亦六員矣五代會要載開運元年勅翰林學士與中書舍人舊分爲兩制各置六員是五代亦六員也南渡後學士不輕授常以它官直院然亦不過二員閒有三員者則周必大所記紹興八年承旨孫近直院曾開勾龍如淵三十一年學士何溥直院虞允文劉珙隆興初承旨洪遵學士史浩直院劉珙是也

見淳熙玉堂雜記

知制誥 却埽編云翰林學士祖宗時多有別領它官如開封府三司使之類者不復歸院供視草之職故銜內必帶知制誥則掌詔命者也官制後雖不領它職然猶帶知制誥如故遇闕則以侍郎給舍兼直學士院近歲有以尙書兼權翰林學士者而不帶知制誥議者謂不若止稱直學士院也予按元豐以前兩制皆稱知制誥學士而知制誥者掌內制也但稱知制誥者掌外制也學士而不掌制則銜內不云知制誥

直學士院

直院始于宋初春明退朝錄開寶二年李

文正以中書舍人盧相以知制誥並命直學士院六年知制誥張公澹直學士院太平興國元年湯率更悅徐騎省鉉直學士院是也自後久無除者熙寧初乃復置

凡他官入院未除學士謂之直院學士俱闕他官暫行院中文書謂之權直周必大玉堂雜記國初久爲學士官至八座已罷職或再來直院神宗改官制後中丞并權六曹尙書若兼內制亦止云直學士院舒亶等是也中興初詹乂已爲龍圖閣學士猶曰權直院其宅如正侍郎以下多帶兼權汪藻等是也厥後

程克俊林待聘楊原等初以給舍兼權稍久乃落權
字以爲恩數至正尙書則帶兼權學士胡交修等是
也乾道三年洪景盧邁奏請自庶官遷侍從便落權
字正兼直院故先以起居郎權直院旣遷中書舍人
卽落權字庚寅秋予以少蓬祕書少監也兼權直院明年
正除權禮部侍郎吏引近制申明合正爲直院予故
抑之兼權如故翰長王日巖職亦不復問其後王季
海淮以太常少卿兼權直院旣除三字中書舍人也卽徑
落權遂爲定例

翰林侍讀學士 侍讀侍講崇政殿說書皆經筵官也

程俱麟臺故事云翰林侍讀學士翰林侍講學士班
秩次翰林學士祿賜如之設直廬于祕閣侍讀更直
侍講長上日給尙食珍膳夜則迭宿令中使日具當
宿官名于內東門進入召對詢訪或至中夕焉

中興後王賓爲御史中丞建請復開經筵遂命兼講自
後十五年間繼之者惟王唐徐俯二人按朝野雜
記云爲王唐公徐師川二人蓋皆舉其字唐公未詳
其名志稱王唐恐誤

正言兼說書自端明丞伋始副端兼說書自端明余堯
弼始端明殿學士蓋二人所終之官非說書時已

任端明也當刪去端明二字乃合史法

察官兼說書自少卿陳夔始 少卿二字亦當刪

修注兼說書自朱震始 按震以祕書少監轉起居郎
兼侍講非說書也

龍圖閣直學士景德四年置以杜鎬爲之班在樞密直
學士下 按樞密直學士五代置宋初尤爲要職石
熙載張齊賢皆由樞密直學士簽署樞密院事亦有
帶出外任者如劉筠自翰林爲臺丞以樞密直學士
知潁州李諮以翰林權使三司以樞密直學士知洪
州是也元豐改制不置此官志遂闕而不書

國初有集賢殿修撰直龍圖閣直秘閣三等 此三等

謂貼職也

直館直院則謂之館職 自太宗建崇文院及秘閣而後士大夫以館職爲榮皆試而後除曰直昭文館直集賢院直史館直秘閣其次爲集賢校理秘閣校理又其次爲館閣校勘皆館職也其餘授則由校勘遷校理又自校理遷直館直院亦有召試徑除直館直閣者

凡狀元制科一任還卽試詩賦各一而入否則用大臣薦而試謂之入館 選舉志英宗時歐陽修言往時

入館有三路進士高科一路也大臣薦舉一路也因
差遣例除一路也此志祇言高科及薦舉蓋因差遣
而除者皆年勞久次之人不試而授所謂貼職非真
館職也以史攷之王曾以進士第一人通判濟州代
還召試政事堂除著作郎直史館李諮以進士第三
人通判舒州召試中書爲太子中允直集賢院此進
士甲科入館之例也富弼舉茂材異等科授簽書河
陽判官又通判絳州遷直集賢院錢易進士第二人
又舉賢良方正科策入等除祕書丞通判信州東封
獻殊祥錄改太常博士直集賢院錢藻進士第又中

賢良方正科爲祕閣校理此制科入館之例也彭乘以進士及第授鳳州團練推官用寇準薦爲館閣校勘聶冠卿以進士授連州軍事推官用大臣薦召試校勘館閣書籍尹洙以進士又舉書判拔萃科知伊陽縣用大臣薦召試爲館閣校勘此大臣薦舉入館之例也又有自薦而試者咸平初祕書丞孫冕上書言事召賜緋魚令知制誥王禹偁試文除直史館是也有大臣子弟乞恩召試者至和初宰相劉沆監護溫成園寢畢辭恩資而爲其子瑾請召試館職遂得祕閣校勘是也至如包拯爲京東轉運使除直集賢

院徙陝西韓億自河北轉運使進直史館知青州文
彥博自殿中侍御史除直史館河東轉運副使孫冲
由轉運使入判登聞鼓院以目疾改直史館知河中
府此因差遣例除者也

職官志三

初淳化三年置磨勘京朝官院四年改太平興國中置
差遣院至是併入審官院 按文獻通攷淳化三年
置磨勘京朝官院又以興國中所置差遣院併入號
磨勘差遣院亦名考課院淳化四年以考課京朝官
院爲審官院此志所云殊未明曉又熙寧中置審官

西院以主武選改審官院爲審官東院此志所當載而失之者也元豐定官制以審官東院爲尙書左選審官西院爲尙書右選流內銓爲侍郎左選三班院爲侍郎右選志亦失書

三班院亦淳化三年置

凡文官自京朝官武官自大使臣以上元豐官制文官通直郎以上爲升朝官承務郎以上爲京官下此則爲幕職令錄之屬

職官志四

臺諫例不兼講讀神宗命呂正獻亦止命時赴講筵中興兼者三人万俟卨羅汝機皆以秦檜意慶元後司

諫以上無不預經筵者矣 詳見第二卷侍講學士

下此重出也中興兼者三人謂王賓王唐公

各未詳徐

俯

凡六察之事 六察者吏察戶察禮察兵察刑察工察也

孫覺薦秀州軍事推官李定對稱旨爲太子中允監察御史裏行 軍事推官乃選人階官之卑者乃越京官五階而驟遷朝官故當時譏其資淺

宋初置三館長慶門北謂之西館 文獻通攷先是朱梁都汴正明中始以今右長慶門東北廬舍十數間

列爲三館則宋初三館尙沿五代之舊也

東廊爲集賢書庫西廊分四部爲史館書庫東廊下

有脫文當云東廊爲昭文書庫南廊爲集賢書庫

大中祥符八年剏外院於右掖門外按是年榮王宮

火焚及崇文院故有外院之設天聖九年徙三館于

左昇龍門外因直集賢院謝絳之請也志當書而闕

之

天禧初令以三館爲額置檢討校勘等員按長編端

拱元年以史館檢討杜鎬爲祕閣校理又麟臺故事

云大中祥符元年崇文院檢討杜鎬等校定南華真

經則檢討之名不始于天禧矣

元祐五年置集賢院學士 按唐制宏文館集賢院分隸門下中書省以見任宰相領大學士其下則有學士直學士宏文則有直館集賢則有校理宋初尙沿其制惟改宏文爲昭文而集賢亦置直院焉昭文館學士罕見除授集賢院學士則自宋初至于熙寧史不絕書或判院事如咸平之錢若水或帶外任如天禧之馬亮慶歷之李宥或判留臺如天禧之晁迥皇祐之吳育而志于學士篇中初不之及蓋闕漏也志云元祐五年置者蓋元豐改官制後廢之至是乃復

置爾

監修國史 按宋初史館與昭文集賢列爲三館以宰相一人監修國史其下有修撰有直館元豐更官制廢三館爲祕書省分四案國史案其一也此亦志所當書而失書

職官志六

乾道中臣僚言三衙軍制名稱不正 此洪邁在翰林日所上劄子也殿前司侍衛馬軍司侍衛步軍司當時謂之三衙各置都指揮使副都指揮使都虞候皆帥也故有三帥殿前步軍二司題名今不可攷矣馬

軍司題名則景定建康志有之攷其所載自建炎以後皆稱主管侍衛馬軍司公事至乾道九年始除趙樽都指揮使淳熙二年除李川王明皆都虞候三年除吳拱都指揮使六年除馬定遠七年除雷世賢皆都虞候十二年世賢遷副都指揮使紹熙元年除張師顏都虞候是容齋之議固已見諸施行開禧以後復有主管馬軍司公事之稱間有除副都指揮使及都虞候者不過十之一二耳

侍衛親軍馬軍 按孝宗乾道七年移侍衛馬軍司屯建康故志有出屯建康之語

次府通判一人大藩或置兩員 凡通判置兩員者則稱東廳西廳以別之南渡後建康府於兩員外添差一員謂之南廳

中興諸大將若韓張呂岳楊劉之流率至兩鎮節度使謂韓世忠張俊呂文德岳飛楊存中劉光世也呂當在楊劉之下或云呂當作吳吳玠亦嘗兼兩鎮也劉錡護國寧武保靜 劉錡當作劉光世

自建炎至嘉泰宰相特拜者六人 按寶慶以後宰相除節度者喬行簡鄭清之趙葵三人志於理宗以後事多闕漏

團練使 宋時有節度副使團練副使皆爲責授官不得簽書公事呂惠卿責授建寧軍節度副使范純仁章惇皆責授武安軍節度副使呂大防責授舒州團練副使劉摯責授鼎州團練副使是也責授官亦宜見於志

職官志七

開禧間江淮四川並置大使休兵後獨成都守臣帶四川安撫制置使 按景定建康志開禧三年置江淮制置使治建康嘉定十年省紹定三年復置六年改沿江制置使是建康不設制司中間祇十年耳志云

休兵後獨成都守臣帶制置使者非也開禧置使本無大字嘉定元年邱密始加大使何澹代密亦爲大使皆前執政也紹定四年趙善湘亦爲大使自改沿江以後寶祐六年除趙與薦開慶元年除馬光祖皆爲大使

又有沿海制置使以明州守臣領之按宋末沿江沿海皆有制司又有京湖制置使或治江陵或治鄂州兩淮制置使治揚州又嘗置淮東制置司於楚州廣南制置司於靜江志皆失於討論也

留守

紹興五年卽建康府治建行宮自後建康守臣

皆兼行宮留守此志亦失書

經畧安撫司經畧安撫使一人 按真宗咸平二年以

王欽若爲西川安撫使安撫之名始此四年以張齊賢爲涇原等路安撫經畧使以梁顥爲副陝西有經

畧安撫使自此始然皆不常置也六年錢若水除并

代經畧使知并州此太原置使之始景德元年以張

齊賢兼青淄濰安撫使知青州

後稱京東東路

丁謂兼鄆齊

濮安撫使知鄆州

後稱京東西路

此京東置使之始是年向

敏中爲鄆延路緣邊安撫使三年置河北緣邊安撫

使於雄州大中祥符元年置河東緣邊安撫司三年

詔昇洪楊廬州長吏兼安撫使八年曹瑋知秦州兼
涇原儀渭鎮戎沿邊安撫使天禧三年瑋爲鄜延路
副都部署環慶秦等州緣邊安撫使然皆或置或省
非有定員仁宗寶元元年知永興軍夏竦兼涇原秦
鳳路安撫使知延州范雍兼鄜延環慶路安撫使康
定元年以夏守贊爲宣徽南院使陝西馬步軍都總
管經畧安撫使慶歷四年罷陝西四路馬步軍都總
管經畧安撫招討使復置隨路都總管經畧安撫招
討使四路者秦鳳州治秦州涇原州治渭州環慶州治慶州鄜延治延州
州也其後罷招討之名又置永興軍治京兆熙河州治熙州

兩路而陝西六路安撫有定員矣慶歷三年置京東西路安撫使八年置河北四路安撫使大名府真定府定州滹州皆無經畧之名皇祐四年詔廣桂二州帶經畧安撫使自是以後諸州府帶安撫使者益多矣

熙寧初詔河東河北陝西三路漕臣許乘傳赴闕按宋人稱轉運爲漕司安撫爲帥司提點刑獄爲憲司提舉常平爲倉司故有漕臣帥臣憲臣倉臣之目

提點刑獄公事 呂祖謙曰太宗淳化二年詔應諸路轉運使各命常參官一人專知糾察州軍刑獄公事此置外路刑獄官之始時猶隸轉運司行之二年勞

擾無補降詔省罷真宗景德四年遂復置之不隸轉

運別爲一司仁廟天聖六年詔令諸路提點刑獄司

朝臣

文臣使臣武臣也

交割本職公事與轉運使副既

罷兩年天聖八年九月復置仍令所至毋得送迎其

吏人約舊數裁減之降詔十月九日是月壬申却權

罷又三年至明道二年冬復置自後提刑一司雖專

以刑獄爲事封樁錢穀盜賊保甲軍器河渠事務浸

緣權執益重而轉運司所總惟財賦綱運之責而已

其後文武官參爲知州軍事 予見石刻孔道輔祭祖

廟文題銜知兗州軍府事又游師雄墓誌題銜知陝

州軍府事蓋大都督府亦稱軍府不稱軍州也

二品以上及帶中書樞密院宣徽使職事稱判 按宋

敏求春明退朝錄云國初曹翰以觀察使判潁州是以四品臨五品州也品同爲知隔品爲判自後唯輔臣宣徽使太子太保僕射爲判餘並爲知州又徐度却掃編云祖宗時凡官僕射及使相以上領州府則稱判元符末章僕射罷相以特進守越州止稱知蓋謫也宣和中余太宰淡以少傅節度使守福復稱知建炎中呂僕射願浩以使相守池守潭守臨安皆稱知趙丞相鼎官本特進再罷相初以節度使守紹興

後改本官守泉皆稱知近歲孟郡王忠厚以使相守
鎮江亦稱知後改婺州改稱判

若河南應天大名府則兼留守司公事 南渡後建康
府亦兼行宮留守

太原府延安府慶州渭州熙州秦州則兼經畧安撫使
馬步軍都總管 按嘉泰會稽志云國初節度使領
馬步軍都部署英宗卽位遷御名改稱都總管其後
守臣兼一路安撫使者皆帶馬步軍都總管以此推
之河東陝西諸路經畧安撫使皆置於仁宗朝當爲
都部署志稱都總管者據後來改名也

瀘州潭州廣州桂州雄州則兼安撫使兵馬鈐轄
南
渡後潭廣桂三州皆帶馬步軍都總管

宋史六

廿二史攷異七十二

錢大昕學

職官志八

建隆三年三月有司上合班儀太師太傅太保太尉司

徒司空東宮三太嗣王郡王僕射三少

謂東宮三少

牧大都督大都護御史大夫六尚書常侍門下中書

侍郎太子賓客太常宗正卿御史中丞左右諫議大

夫給事中中書舍人左右丞

監本脫丞字依禮志增

諸行侍郎

秘書監光祿衛尉太僕大理鴻臚司農大府卿國子

祭酒殿中少府將作監前任見任節度使開封河南

太原尹詹事諸王傳司天監五府尹國公郡公中都
督上都護下都督庶子五大都督府長史中都護副
都護太常宗正少卿祕書少監光祿等七少卿司業
三少監三少尹少詹事諭德家令率更令僕諸王府
長史司馬司天少監起居郎舍人侍御史殿中侍御
史補闕拾遺監察御史郎中員外郎太常博士五府
少尹五大都督府司馬通事舍人國子五經博士都
水使者四赤縣令太常宗正祕書丞著作郎殿中丞
六尚奉御大理正中允贊善中舍洗馬諸王友諮議
參軍司天五官正凡雜坐之次以此爲準

所謂雜詔
壁也

曰尚書中臺萬事之本而班位率次兩省官監本今依禮志改節度使出總方面其檢校官多至師傅三公

者而位居九寺卿監之下甚無謂也其給事中諫議大夫宜降于六曹侍郎之下補闕次郎中拾遺監察次員外郎節度使升于中書侍郎之下此亦見禮志

開寶六年詔晉王位望俱崇親賢莫二宜位在宰相之上此亦見禮志

翰林資政保和殿大學士翰林無大學士之稱此翰林二字衍文

職官志九

太師太傅太保謂之三師太尉司徒司空謂之三公凡除授則自司徒遷太保自太傅遷太尉檢校亦如之此文已見本志三師三公篇又見合班篇一志之中前後三見

治平二年翰林學士賈黯奏近者皇子封拜並除檢校太傅臣謹按三師訓導之官蓋天子之所師法今皇太子以師傅名官於義弗安莫甚于此蓋前世因循失于釐正臣愚以爲自今皇子及宗室卑者除官並不可帶師傅之名隨其叙遷改授三公之官詔俟將

來因加改正自此皇子及宗室卑行遂不除三師官
此事又見賈黯傳政和中罷三公官以太師太傅
太保爲三公而皇子之除保傅者益多矣

元豐官制定有請并易內侍官名者神宗曰祖宗爲此
名有深意豈可輕議政和二年始遂改焉 此語已
見本志入內內侍篇其所改則通侍正侍中侍中亮
中衛拱衛大夫及供奉官左侍禁右侍禁左班殿直
右班殿直凡十一階并黃門爲十二此卷則以通侍
大夫以下六官列於武階之內中亮大夫本易宣慶
使而此云客省使中衛大夫本易宣政使而此云引

進使拱衛大夫本易昭宣使而此失書舊官名其乖舛如此但中亮中衛左武右武四階本以換橫班之名而宣慶宣政二使亦同換斯名此又史文之可疑者也

勲一十二上柱國柱國上護軍護軍上輕車都尉輕車都尉上騎都尉騎都尉驍騎尉飛騎尉雲騎尉武騎尉 此已見本志司勲篇

紹興以後階官 按南渡文武寄祿官階一遵元豐政和之舊而志復重列之連篇累牘皆可省也

職官志十

幕職初授則試校書郎再任如至兩使推官則試大理評事掌書記支使防禦團練判官已上試大理司直評事又加則兼監察御史亦有至檢校員外郎以上者其解褐評事校書郎正字寺監主簿助教者謂之試銜有選集同出身例 此已見本志試秩篇

在京官觀舊制以宰相執政充使或丞郎學士以上充副使兩省或五品以上爲判官內侍官或諸司使副爲都監又有提舉提點主管 按宮觀之設昉于真宗祥符七年建玉清昭應宮以宰相王旦充使參知政事丁謂爲副使戶部侍郎林特同副使左正言直

集賢院夏竦爲判官是年置景靈宮使以中書侍郎
平章事向敏中爲之尚書右丞趙安仁爲副使知制
誥劉筠爲判官九年置會靈觀使以參知政事丁謂
爲之翰林學士李廸爲副使知制誥樂黃目爲判官
天禧中建祥源觀以樞密副使錢惟演爲都大管勾
祥源觀公事天聖初樞密副使張士遜爲祥源觀使
此宰執領官觀使之例也見李氏長編其後天聖七年王
清昭應宮災遂罷輔臣爲官觀而景靈會靈祥源三
官觀以學士舍人管勾康定元年李康靖公若谷罷
參知政事爲資政殿大學士提舉會靈觀自後學士

皆爲提舉至和初晏元獻公殊以舊相爲觀文殿大學士提舉萬壽觀而武臣李少師端愿爲觀察使止得管勾祥源觀自陳乃加以都管勾見春明退朝錄蓋提舉之名不輕授如此熙寧以後乃有以朝官充提舉者非故事也玉清昭應之災獨長生崇壽殿存詔改爲萬壽觀皇祐五年會靈觀火獨三聖御容得存詔權奉安於景靈宮更名集禧觀治平中又建醴泉觀徽宗朝又有祐神觀先是雍熙元年修東太一宮天聖七年修西太一宮熙寧元年又建中太一宮於集禧觀之東此在京宮觀之目也玉清會靈先後焚燬祥

源觀亦於至和元年災自後不置使職徽宗重和元

年詔宰臣兼神霄玉清宮使

蔡京鄭居中
余深童貫

執政官充

副使

鄧洵武薛昂白
時中王鶴蔡攸

開封尹充判官少尹充管勾又

詔天下天寧萬壽觀改爲神霄玉清宮小州監無道
觀者以僧寺充知州軍帶管勾字通判帶同管勾字
此亦宜見于志今志但有靖康元年罷內外官見帶
提舉主管神霄玉清宮之文而于置使副管勾則不
書蓋失之矣宮觀本置管勾官南渡後避思陵嫌名
改爲主管志述東都事而云主管或云管幹則史臣
追改也

其戚里近屬及前宰執留京師者多除官觀以示優禮
按明道中錢文僖爲景靈宮使其後王貽永王德
用賈昌朝皆以前執政爲景靈宮使治平中武康節
度使李端愿以外戚爲醴泉觀使又仁宗時李端懿
以鎮國軍節度留後提舉集禧觀亦外戚也

又詔杭州洞霄官亳州明道官華州雲臺觀建州武夷
觀台州崇道觀成都玉局觀建昌軍仙都觀江州太
平觀洪州玉隆觀五嶽廟自今並依嵩山崇福宮舒
州靈仙觀置管幹或提舉提點官 徐度却掃編云
在外州府官觀舊惟西京崇福宮南京鴻慶宮舒州

靈仙觀鳳翔府上清太平宮兗州仙源縣景靈宮太
極觀有提舉管勾官熙寧初始詔杭州洞霄宮永康
軍丈人觀亳州明道宮華州雲臺觀建州武夷觀台
州崇道觀成都府玉局觀建昌軍仙都觀江州太平
觀洪州玉隆觀五嶽廟太原府興安王廟皆置此志
不及丈人觀興安王廟又文獻通攷崇寧三年添宮
觀十政和三年添宮觀三十志亦失書靈仙觀後改
真源萬壽宮太平觀後改太平興國宮玉隆觀後改
玉隆萬壽宮武夷觀亦稱沖祐觀列傳所載又有毫
州太清宮建康府崇禧觀兗州岱嶽觀慶元府至道

官紹興府千秋鴻禧觀蓋政和以後增置又有元封觀太沖觀未詳所在

元豐中王安石以右僕射觀文殿大學士爲集禧觀使却掃編天聖初輔臣罷領宮觀使其後惟以使相節度宣徽使爲之無所職掌奉朝請而已熙寧間又有以使居外者王荊公以使相領集禧觀使居金陵張文定公以宣徽南院使領西太一宮使居睢陽蓋優禮也

呂公著韓維以資政殿學士兼侍讀仍提舉中太一宮兼集禧觀公事此已見本志宮觀兼侍讀篇惟彼

文稱公著爲大學士以公著傳攷之其時實由學士
進大學士也范鎮落致仕以端明殿學士提舉中太
一宮兼集禧觀公事亦兼侍讀然鎮固辭未拜也

元祐間馮京以觀文殿學士梁燾以資政殿學士爲中
太一宮醴泉觀使 謂京爲中太一宮使燾爲醴泉
觀使也按却掃編梁左丞燾罷政事除資政殿學士
特置同醴泉觀使之名以命之梁公言故事無以學
士領宮觀使者且同使之名前所未有力辭不受然
自是前二府往往以學士直爲宮觀使矣燾除醴泉
使有同字志所書未核

高遵固年八十一乞再任官觀高遵禮年七十六乞再任亳州太清宮按高瓊及外戚傳不見二人名

三省言張方平元係宣徽南院使檢校太傅太子少師致仕元豐官制行廢宣徽使元祐三年復置儀品恩數如舊制方平依舊帶宣徽南院使致仕此已見本志宣徽篇

食貨志上二

都官員外郎馮康國言四川地狹民貧祖宗時正稅重者折科稍輕正稅輕者折科稍重二者平準所以無偏重偏輕之患百有餘年民甚安之近年漕總二司

輒更舊法反覆紆折取數務多致民棄業逃移望並
罷之一遵舊制詔如所請令憲臣察其不如法者

此又見康國傳

食貨志上三

大中祥符三年河北轉運使李士衡又言本路歲給諸
軍帛七十萬民間罕有緡錢常預假於豪民出倍稱
之息至期則輸賦之外先償逋欠以是工機之利愈
薄請預給帛錢俾及時輸送則民獲利而官亦足用
詔優予其直自是諸路亦如之 此又見士衡傳彼
文士作仕誤

食貨志上四

蘇轍自大名推官上書召對亦除條例司檢詳文字安石出青苗法示之轍曰以錢貸民使出息二分本非爲利然出納之際吏緣爲奸雖有法不能禁錢入民手雖良民不免非理費用及其納錢雖富民不免違限如此則鞭笞必用州縣多事矣唐劉晏掌國計未嘗有所假貸有尤之者晏曰使民僥倖得錢非國之福使吏倚法督責非民之便吾雖未嘗假貸而四方豐凶貴賤知之未嘗逾時有賤必糴有貴必糶以此四方無甚貴甚賤之病安用貸爲晏之言漢常平法

耳公誠能行之晏之功可立俟也安石自此逾月不言青苗 此又見蘇轍傳

司馬光曰青苗出息平民爲之尙能以蠶食下戶至饑寒流離况縣官法度之威乎呂惠卿曰青苗法願則取之不願不强也光曰愚民知取債之利不知還債之害非獨縣官不强富民亦不强也及拜官樞密副使光上章力辭至六七日帝誠能罷制置條例司追還提舉官不行青苗助役等法雖不用臣臣受賜多矣不然終不敢受命竟出知永興軍 此又見司馬光傳

食貨志下六

天聖三年八月詔翰林侍講學士孫奭等同究利害
按長編紀事本末是月辛卯命翰林侍讀學士孫奭
知制誥夏竦同工部郎中盧士倫殿中侍御史王碩
如東使盧守懃再加詳定

兵志一

太平興國二年詔改簇御馬直曰簇御龍直鐵騎曰日
騎龍提曰龍衛控鶴曰天武虎提曰神衛骨朶子直
曰御龍骨朶子直寬衣控鶴曰寬衣天武雄威曰雄
勇龍騎曰驍猛 按諸軍改名既總敘于前而下文

又逐條列之當刪存其一惟控鶴之爲天武則後條
失書

建康五萬池州一萬二千鎮江四萬七千楚州武鋒軍
一萬一千鄂州四萬九千荆南二萬興元一萬七千
金州一萬一千 文獻通攷今鎮江大軍則韓世忠
之舊部建康大軍則張俊之舊部鄂州大軍則岳飛
之舊部也紹興末荆南江州池州又皆新募兵籍荆
南所屯則劉錡所招効用益以鄂州之卒江池之軍
則三衙疲弱之卒屯戍者江州一軍大抵皆茶寇也
而興元府興州金州三都統兵則本曲端吳玠關師

古之徒關西之舊部也又云四川之兵曲端死吳玠并將其兵王庶劉子羽在興元又招其流散立成部伍子羽罷玠又併將其兵故玠之兵十萬玠死胡世將爲宣撫命吳玠以二萬守興州楊政以二萬守興元郭浩以八千守金州而玠之中部三萬人分屯仙人關內外璘併將之是以四川之兵獨偏重於興州其禁軍將校則有殿前司都指揮使副都指揮使都虞候各一人諸班直都虞候指揮使都知副都知押班御龍諸直有四直都虞候本直各有都虞候指揮使副指揮使都頭副都頭十將將虞候馬步軍有捧日

天武左右四廂都指揮使捧日天武左右各有都指揮使每軍有都指揮使都虞候每指揮有指揮使副指揮使每都有軍使步軍謂之都頭副兵馬使步軍謂之都頭十將將虞候承局押官此又見職官志當去此存彼侍衛司倣此

兵志二

熙寧以後之制按熙寧以後三衛軍額與前不甚相遠史家第據三朝四朝兩志之文分而列之若攷其沿革并爲一篇則文省而例亦不紊矣

侍衛司侍衛親軍馬步軍都指揮使副都指揮使都虞

候各一人馬軍都指揮使副都指揮使都虞候各一人步軍亦如之自馬步軍都虞候以上其員全闕卽馬軍步軍都指揮使等各兼領其務馬步軍有龍衛神衛左右四廂都指揮使龍衛神衛左右廂各有都指揮使每軍有都指揮使都虞候每指揮有指揮使副指揮使餘如殿前司之制其所領騎步軍之額如左 此文與前卷全同

武鋒精銳敢勇鎮淮彊勇雄勝武定 按武鋒以下諸軍不言屯駐之所蓋有脫文据本志稱楚州武鋒軍一萬一千則武鋒等軍常在楚州屯駐矣又按建康

鎮江江州池州鄂州俱有駐劄都統司兵建康又有
馬軍行司而沿江制司所領又有防江軍効用軍破
敵軍精銳軍御前策勝軍淳祐五年置三萬人分六
軍前軍左軍屯鎮江右軍
中軍屯建康先鋒後軍屯池州制効軍游擊軍義士軍皆宜見於
此篇蓋此卷脫漏甚多惜無善本補之

明州水軍紹興置乾道元年二千人分兩右兩將 按
寶慶四明志制置司水軍紹興二年置十一年兵隨
司罷三十一年金人寇邊明州復屯殿司水軍二千
人隆興元年海寇朱百五等倡亂戶部侍郎趙子清
復帶沿海制置使知明州就鎮殿司軍二千人收捕

二年寇平屯兵以次起發子滿言明州密邇行都水陸控扼事體非輕乞存留未起發人并招置水軍一千人陞水軍統領鄭廣爲統制聽明州使喚自是明州駐兵爲額三千乾道七年差林文充統制仍將本官自福州帶來水手一千撥付兵額始有四千人與史所載額數不合竊意志文二千當爲三千之謬下文又有一條云沿海水軍乾道六年置一千人當卽指林文所帶水手而言若將二條并爲一改此文二千爲三千則與四明志相應矣

兵志三

建炎後禁廂兵 廂字衍按南渡禁廂軍志但言所隸

州軍其指揮多少之數則未之及蓋典籍殘闕不及

東都九朝之完具矣今就可攷者書之臨安府禁軍

廿九指揮曰威捷弟一曰威果弟四曰威果弟五曰

威果弟六曰雄節弟八曰雄節弟十六曰全捷弟二

曰全捷弟三

右東南
必三將

曰武騎弟六曰武騎弟七曰廣

勇左一四曰廣勇左一五曰廣勇左一六曰廣捷弟

四曰廣捷弟五曰廣捷弟六曰忠節弟二曰驍猛弟

一曰神威弟七曰雄勇弟二曰雄威弟六曰効忠弟

二十四曰効忠弟七十五曰効忠弟七十七

右京畿
弟二將

曰雄節第十七曰威果第六十一曰全捷第十七曰

龍騎曰歸遠

右兵馬
鈴轄司

廂軍廿六指揮曰崇節第一曰

崇節第二曰崇節第三曰崇節第四曰崇節第五曰

崇節第六曰捍江第一曰捍江第二曰捍江第三曰

捍江第四曰捍江第五曰修江曰都作院曰小作院

曰清湖閘曰開河司曰北城堰曰西河廣濟曰樓店

務曰長安堰閘曰秤斗務曰壯城曰鼓角匠曰橫江

水軍曰船務曰牢城建康府禁軍十一指揮曰威果

十三曰威果十四曰威果十五曰威果四十四曰忠

節十一曰全捷第一曰全捷第六曰武雄第一曰馬

攷異

宋史六

齒

軍曰忠義曰橫江水軍廂軍四指揮曰効一日効二

曰牢一日牢二

効者効勇也
牢者牢城也

平江府禁軍五指揮曰

威果二十八曰威果四十一曰威果六十五曰雄節

第九曰全捷二十一廂軍十指揮曰崇節第九曰崇

節第十曰崇節第十一曰崇節第十二曰壯城曰中

軍鼓角曰橫江曰寧節第三曰城下開江曰作院紹

興府禁軍九指揮曰雄節第一曰威捷第二曰威果

二十二曰威果二十三曰全捷第四曰全捷第五

以上

爲係

曰威果五十四曰全捷十三

以上不
係將

曰防守步

軍司

主守護
橫官

廂軍七指揮曰崇節第七曰崇節第八

曰壯城曰牢城寧節第二曰屯駐營曰作院曰剽員
慶元府禁軍五指揮曰威果三十曰威果五十五曰
雄節曰威勝曰全捷廂軍九指揮曰崇節二十八曰
崇節二十九曰崇節三十曰壯城曰都作院曰船塢
曰剽員曰寧節曰清務徽州禁軍三指揮曰威果曰
忠節曰武雄俱未詳其弟廂軍三指揮曰効勇曰牢城曰
壯城福州禁軍三指揮曰威果二十四曰威果二十
五曰全捷第九本第三十大觀元年改又有有馬雄畧指揮荻
蘆寨水軍延祥寨水軍亦稱禁軍廂軍九指揮曰保
節第一曰保節第二曰保節第三曰保節第四曰壯

城曰牢城曰剩員曰都作院曰養老寧節今志於禁
兵威果忠節武雄下失注建康徽字全捷下失注建
康字忠節下失注杭字廂兵効勇下失注建康字保
節下失注福字寧節下失注平江慶元字都作院下
失注慶元福字平江亦有作院清務下失注慶元字若臨安
之武騎廣勇廣捷驍猛神威雄勇雄威効忠龍騎歸
遠皆稱禁軍而志皆不見其名

刑法志一

先是太祝刁衍上疏言古者投姦人于四裔今乃遠方
囚人盡歸象闕配務役神京天子所居豈可使流囚

於此聚役禮曰刑人于市與衆棄之則知黃屋紫宸之中非行法用刑之所望自今外處罪人勿許解送上京亦不留于諸務充役御前不行決罰之刑殿前引見司鉗黥法具杖皆以付御史廷尉京府或出中使或命法官具禮監科以重明刑謹法之意帝覽疏甚悅降詔褒荅然不能從也 此又見衍傳

刑法志二

太府寺主簿蔡渭奏臣叔父碩嘗于邢恕處見文及甫元祐中所寄恕書具述姦臣大逆不道之謀及甫彥博子也必知姦狀詔翰林學士蔡京吏部侍郎安惇

同究問初及甫與恕書自謂畢禱當求外入朝之計
未可必聞已逆爲機筭以榛塞其途又謂司馬昭之
心路人所知又云濟之以粉昆朋類錯立欲以眇躬
爲甘心快意之地及甫嘗語蔡碩謂司馬昭指劉摯
粉昆指韓忠彥眇躬及甫自謂蓋俗稱駙馬都尉爲
粉侯人以王師約故呼其父堯臣爲粉父忠彥乃嘉
彥之兄也及甫除都司爲劉摯論列又摯嘗論彥博
不可除三省長官故止爲平章軍事及彥博致仕及
甫自權侍郎以修撰守郡母喪除與恕書請補外因
爲躁忿詆毀之辭及置對則以罪比摯如舊眇躬乃

以指上而粉昆乃謂指王巖叟面如傅粉故曰粉梁
燾字況之以況爲兄故曰昆斥摯將謀廢立不利于
上躬京惇言事涉不順及甫止聞其父言無他證佐
望別差官審問乃詔中書舍人蹇序辰審問仍差內
侍一員同往此又見劉摯傳堯臣當是堯臣之謗